



# KARANTENENEMNDA

---

Gunhild Berge Stang

Vår dato	Din dato	Vår referanse
25.03.2021	16.03.2021	2021/3

## Vedtak i samband med overgang til stilling som dagleg leiar i Sunnfjord Utvikling AS

Vi viser til meldinga di til Karantenenemnda datert 11. mars 2021.

### Vedtak

Karantenenemnda har gjort vedtak om at du skal ha karantene i 6 månader frå 1. april 2021 til og med 30. september 2021 i samband med overgang frå embete som statssekretær i Kulturdepartementet (KUD) til stilling som dagleg leiar i Sunnfjord Utvikling AS. Grunnlaget for karantene i saka di er karantenelova § 6 b) og c) Du skal ikkje ha saksforbod.

### Rettsleg grunnlag

Karantenenemnda kan gje pålegg om at ein politiskar eller tidlegare politiskar i eit departement skal ha karantene i inntil seks månader etter at du har fråtredd frå den politiske stillinga eller embetet. Sjå lov 19. juni 2015 nr. 70 om informasjonsplikt, karantene og saksforbod for politikere, embetsmenn og statstilsette (karanteneloven) § 6, som har denne ordlyden:

"Karantenenemnda kan, ved overgang til stilling eller verv utenfor statsforvaltningen eller etablering av næringsvirksomhet, i særlige tilfeller ilegge en politiker karantene i inntil seks måneder etter fratreden når

- det foreligger en konkret forbindelse mellom politikerens tidligere ansvarsområder, arbeidsoppgaver i den politiske stillingen eller bestemte saker som var til behandling i departementet i politikerens funksjonstid, og interessene til den virksomheten politikerens blir tilknyttet eller etablerer, eller
- politikerens tidligere ansvar og arbeidsoppgaver har gitt eller kan gi virksomheten politikerens blir tilknyttet eller etablerer, særlige fordeler, eller
- overgangen på annen måte kan være egnet til å svekke tilliten til forvaltningen generelt."

På same vilkår kan Karantenenemnda gje pålegg om saksforbod i tillegg til, eller i staden for, karantene. Sjå karantenelova § 7. Saksforbod kan påleggjast i inntil tolv månader etter at du har fråtredd. Dersom det ligg føre særleg tungtvegande årsaker, kan det påleggjast eit

saksforbod i inntil tolv månader etter at du har fråtredd, i tillegg til ein karantene på inntil seks månader.

### **Saksforholdet**

Du har vore statssekretær i Kulturdepartementet frå 1. mai 2020 til 1. april 2021. I embetet hadde du ansvar innan saksområda kultur, idrett, frivillig verksemd, media, likestilling og ikkje-diskriminering.

Du skal starte i stillinga som dagleg leiar i Sunnfjord Utvikling AS. Sunnfjord Utvikling AS er nærings- og tiltaksapparatet til Sunnfjord kommune og næringslivet i Førde, Gaular, Jølster og Naustdal. Selskapet er eigd av Sunnfjord kommune og næringslivet i området. Selskapet skal rådgje lokalt næringsliv og fremja interessene deira ovanfor offentleg sektor.

### **Karantenenemnda si vurdering**

Karantenenemnda har vurdert om overgangen er eit særleg tilfelle som grunnjev karantene, og har kome fram til at dette vilkåret er til stades. Avgjerda om karantene er gjort med heimel i karantelova § 6 b) og c).

Karantenenemnda si grunngeving er at ansvaret ditt og gjeremåla dine som statssekretær i Kulturdepartementet kan gje Sunnfjord Utvikling AS, og verksemdar innan nærings- og kulturlivet som selskapet arbeider for, særlege fordelar. Karantenenemnda legg vekt på at det vil kunne svekkja tiltrua til forvaltninga om du byrjar i stillinga rett etter at du sluttar i embetet i Kulturdepartementet. Karantenenemnda har lagt vekt på at du har kunnskap om saker frå tida di som statssekretær som kan nyttast i saker som Sunnfjord Utvikling AS arbeider med. Du skal mellom anna arbeide med å sikre statleg finansiering for ulike verksemdar i regionen.

Karantenenemnda har kome fram til at det er naudsynt å ilegga karantene i 6 månader i saka di. Det skiljet i tid som desse seks månadene utgjer bidreg til å skapa den naudsynte avstanden i tid mellom embetet som statssekretær og den nye stillinga som dagleg leiar. Denne avstanden i tid medverkar til å halda oppe tiltrua til forvaltninga og det politiske systemet.

Karantenenemnda har vedteke at du ikkje skal ha saksforbod.

### **I karantenetida**

Karantene betyr at du får forbod mot å byrja i stillinga som dagleg leiar i Sunnfjord Utvikling AS før 1. oktober 2021. Karantene inneber at du ikkje kan ha kontakt med ny arbeidsgjevar i karanteneperioden. Kontakt som er naudsynt av praktiske grunnar for å førebu tiltreding er likevel tillate.

### **Godtgjering**

I karantenetida får du lønskompensasjon svarande til løna di på fråtredingstidspunktet med tillegg av feriepengar. Sjå karantelova § 8.

### **Retten til ny vurdering mv.**

Du har rett til å be om at Karantenenemnda gjer ei ny vurdering av saka di. Dersom du ønskjer ny vurdering, må du senda krav om dette innan fem dagar etter at du har motteke vedtaket. Sjå karantelova § 3 tredje ledd.

Du kan ikkje gå til søksmål for å få gjort Karantenenemnda sitt vedtak ugyldig utan at det er kravd ny vurdering, og ny vurdering er gjeven. Sjå karantelova § 3 femte ledd.

Etter forvaltningslova § 18 jf. § 19 har du rett til å sjå dokumenta i saka.

Informasjonsplikta etter karantanelova § 5 gjeld i eitt år etter at du har fråtredd det politiske embetet eller den politiske stillinga.

Med helsing

Reidun Slåen (e.f.)

Bente Langsrud Vive

*Vedtaket frå Karantenenemnda er godkjent elektronisk og inneheld ikkje signatur*

Kopi:  
Kulturdepartementet  
Statsministerens kontor  
Sunnfjord Utvikling AS